

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

**„Zato podaj bližnjemu pravo njegovo, i siromahu i putniku! To je bolje za one koji nastoje da se Allahu umile; takvi će postići ono što žele.“** (Er-Rum, 38)

Poštovana braćo i sestre, draga djeco i omladino, esselamu alejkum!

Dočekivanje i lijep odnos prema gostima sastavni je dio našega imana. Poslanik, s.a.v.s., je rekao: **“Tko vjeruje u Allaha i Sudnji dan, neka dočeka gosta. Tko vjeruje u Allaha i Sudnji dan, neka lijepo postupa prema susjedu. Tko vjeruje u Allaha i Sudnji dan, neka govori samo ono što je dobro ili neka šuti.”**

Mi ćemo se danas, ukratko podsjetiti na za ovaj dio imana i vidjeti kakvo je njegovo mjesto u Islamu.

Prva gostoprimstva vezuju se za Ibrahima, a.s., koji je imao nadimak „Ebu Dajfan“ (onaj koji rado dočekuje goste). Za njega se kaže da je imao kuću sa četvero vrata, sa svake strane po jedna, kako ga nitko od prolaznika ne bi mašio. Znao je vrlo često i dugo hodati tražeći nekoga s kime bi mogao jesti, a kad ne bi nikoga našao, bio bi veoma tužan. I

zbog tog svog lijepog odnosa prema gostima i mnogih drugih izuzetnih vjerničkih osobina dobio je nadimak „Halilullah“ (Allahov prijatelj), a to je najveća titula i najviše zvanje koje čovjek može dostići. Zvanja poput predsjednik države, milijarder, akademik i slično, ne mogu ni papuča okrenuti.

I Poslanik Muhammed, s.a.v.s., je rado dočekivao goste, a i svojim ashabima je to preporučivao, pa čak i naređivao. Prenosi se da bi nakon sabah-namaza znao reći ashabima: **“Neka svako od vas uzme sebi po nekoliko ljudi u goste!”** Neki od ashaba bi uzeli po dvojicu-trojicu, a ostale bi ugostio osobno Poslanik, s.a.v.s..

A da bi upozorio svoje ashabe, a i cijeli Ummet, na štetne posljedice neprihvatanja gostiju, rekao je: **“Nema hajra u narodu koji ne dočekuje goste.”**

Mi smo, hvala Allahu, narod u kome ima hajra, koji lijepo dočekuje goste, iako bi to ugošćavanje moglo biti i malo češće. Mi, bar tako izgleda, kao da se bojimo gostiju i troška. A i povijest je pokazala su siromašniji ljudi uvijek srčanije dočekivali goste, nego bogataši. Zato imajte u vidu Poslanikove, s.a.v.s., riječi: **“Zaista meleki donose salavat na domaćina, dokle god mu je sofru (trepeza) postavljena.”**

Dakle, kuća u kojoj ima bujruma, ima i bereketa. I

kod takvih posjeta, na žalost, dobar dio džemata prilično slabo učestvuje u dočekivanju gostiju. Sutra, ako Bog da, imamo Regionalno druženje omladine medžlisa Livno, Dubrovnik, Zadar i našeg. Na omladinu smo apelirali da se odazovu i da pripreme doček za goste, naravno, uz našu pomoć. Neki su se odazvali a neki i ne. Neki će se možda napraviti naivni kako što su i do sada činili te doći samo da zavire i vide što ima i slično.

Pored omladine, u posjet nam dolazi uvaženi prof. dr. Esmir ef. Halilović. On će biti gost predavač našoj omladini u subotu a imat će i posebno predavanje za sve džematlije u nedjelju poslije podne namaza. Zato, Allah vas nagradio i pomogao, odazovite se i pomozite organizaciju ovog lijepog događaja.

A sada ćemo se podsjetiti na neka od pravila vezano za goste i gostoprimstvo;

Prvo pravilo je vezano za sam doček gosta. Učenjak El-Evza'i kaže: **„Pravi doček gostiju jeste osmijeh na licu.”** Dakle, pokaži gostima da ti je drago što ih vidiš i što su ti došli.

Zatim gostu treba dati njegovo pravo. Poslanik, s.a.v.s., je rekao: **“Tko vjeruje u Allaha i Sudnji dan, neka dadne gostu njegovo pravo.”** Ashabi upitaše: **„Poslaniče, koje je njegovo pravo?”** On odgovori: **“Njegovo pravo je dan i noć, a**

***kompletno gostoprinstvo je tri dana. Sve što bude više od tri dana, to je sadaka.***“ Ovo znači da je domaćin dužan da jedan dan i jednu noć ugosti gosta sa posebno pripremljenom hranom, a da će ostala dva dana gost jesti isto ono što i domaćin.

U goste se ide samo sa najavom ili ako je čovjek pozvan. U suprotnom, domaćin je slobodan da izabere da primi gosta ili da mu odgodi gostoprinstvo. Poslanik, s.a.v.s., je rekao: ***“Tko bude pozvan u goste, pa ne ode, ogriješio se prema Allahu i Njegovom poslaniku, a tko uđe u kuću nepozvan, ušao je kao lopov, a izaći će kao napasnik.***“

Na ispraćaju gosta, sunnet je dopratiti ga do vrata, a onda je lijepo zatražiti halala ako je nešto kod gostoprinstva manjkalo. S druge strane, gost mora voditi računa da njegov boravak u gostima bude umjeren i pristojan, odnosno, da ne bude odviše na teret za domaćine.

U poučnoj pripovijesti - hikaji se kaže da je jedan učenjak došao pred vrata sultanovog dvorca. Niti jedan ga stražar nije zaustavio sve dok nije došao do sultana koji je sjedio na prijestolu.

- Što želiš? - upita ga sultan koji ga je odmah prepoznao. - Želim mjesto za spavanje u ovom prenoćištu - odgovori učenjak. - Ali ovo nije

prenoćište - pobuni se sultan - Ovo je moja palača. - Mogu li te upitati tko je posjedovao ovu palaču prije tebe? - Moj otac. On je umro. - A tko ju je posjedovao prije njega? - Moj djed. On je također umro. - Dakle, ovo je mjesto gdje ljudi žive kratko vrijeme, a zatim odu. Jesam li te dobro čuo da ovo nije prenoćište?

Eto, na kraju današnje hutbe, možemo konstatirati da smo obnovili svoje znanje i podsjetili se na važnost i blagodati dočekivanja gostiju, privatnih i džematskih, te koja su to najvažnija pravila vezana za domaćina i gosta. Nadam se, da ćemo ih imati u vidu kada ubuduće budemo dočekivali goste ili išli u goste.

Molim Uzvišenog Allaha da nas uputi na Pravi put, da nas učini dobrim domaćinima koji rado dočekuju goste i kojima u kuću dolaze čestiti i hajirli Allahovi robovi.

Amin!

Hutba je temeljena na pisanju hfz. Midhat ef. Sejfića  
Pripremio: Vahid ef. Hadžić Split, 10.11.2017.

ISLAMSKA ZAJEDNICA U HRVATSKOJ  
MEDŽLIS ISLAMSKE ZAJEDNICE SPLIT



ISLAMSKI ODNOS  
PREMA GOSTU

499